

『聖德太子傳曆』上 推古三年条

三年〈乙卯〉春〈傍三月イ（有）〉。土佐南海。夜有大光、亦有聲如雷。經三十箇日矣。夏四月。著淡路嶋南岸。嶋人不知沈水、以交薪燒於竈。太子遣使令獻。其大一圍〈長八尺。〉其香異熏。太子觀而太悅。奏曰。是爲沈水香者。此木名梅檀香木。生南天竺國南海之岸。夏月。諸虵相繞。此木冷故也。人以矢射之。冬月。虵蟄。卽折而採之。其實雞〈傍雞イ〉舌。其花丁子。其脂熏陸。沈水久者爲沈水香。不久者爲淺香。而今陛下興隆釋教。肇造佛像。故釋梵感德。漂送此木。卽有敕。命百濟工刻造檀像。作觀音菩薩。高數尺。安吉野比蘇寺。時々放光。時時放光。五月。高麗僧惠慈。百濟僧惠聰等化來。此兩僧博涉內外。尤深釋義。則太子問道。聞一知十。聞十知百。二僧相語曰。是實眞人也。或不思而達出論外。三年業成。道被幽顯。聽政之日。宿訟未決者八人。共聲白事。太子一々能辨答。各得其情緒。無復再訪。大臣率群臣已下。敢獻御名。稱厩戸豐聰八耳皇子。又稱大法王皇太子。太子辭讓矣。